

**Uunga siunnersuut: Nioqqutissanik eqqussuinermi akitsuutit pillugit Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2016-imeersoq**

(Aningaasaqarnermut Aatsitassanullu Naalakkersuisoq)

**Saqqummiussissut**

(Aningaasaqarnermut Aatsitassanullu Naalakkersuisoq)

**Siullermeerneqarnera**

Nioqqutissanik eqqussuinermi akitsuutit pillugit Inatsisartut inatsisaat allangortinneqarneranut siunnersuummik matumuuna Naalakkersuisut sinnerlugit saqqummiussissaanga.

Aallaqqaasiutigalugu ajuusaarutigalugu nalunaarutigissavara, inatsisissatut siunnersuummut matumunnga naqqiummik nassiussinissaq pisariaqarsimammat, inatsisissatut siunnersuutip akuerineqarneranit, Nioqqutissanik eqqussuinermi akitsuutit pillugit Inatsisartut inatsisaat nr. 21, 23. november 2015-imeersup, maannakkut atuuttutut 20. august 2015-imi atuutilersinneqarneranut taarsiullugu, taamani inatsisissatut siunnersuutip nalunaarutigineqarnerani 23. november 2015-imi aatsaat atuutilersitsinermik imaqartumik. Inatsisip kingumut atuuttumik atornerata atorunnaarsinneqarneranik, aamma akitsuutit akilerneqarsimasut utertinneqarnissaannik allannguutit imaqarput.

Kiisalu Inatsisartunut utoqqatsissutigissavara, februaarimi 2016-imi Naalakkersuisutut sulilernerma kingunerani, allaffissornikkut kukkusoqarneratigut, piaarinaatsoortumik piffissami 20. august 2015-imiit 23. november 2015-imut, akitsuummit iluanaarutaasut kiisalu akitsuummit eqqugaasimasut pillugit paasissutissanik amigartunik saqqummiussisimanera.

Nioqqutissanik eqqussuinermi akitsuutit pillugit inatsimmi, 2015-imi ukiakkut ataatsimiinnermi akuerineqartumi kingumut atuuttumik atornerup atorunnaarsinneqarnerata saniatigut, Nioqqutissanik eqqussuinermi akitsuutit pillugit Inatsisartut inatsisaannik allannguineramik, imeruusaatit koffeinitallit kiisalu erngup eqqussap eqqussuinermi nutaanik akitsuusiinissat pillugit siunnersuutininik, siunnersuut manna imaqarpoq. Taamaasilluni 2016-imut aningaasanut inatsit pillugu partiit isumaqatigiissutaannit inatsisissatut siunnersuut aallaaveqarpoq.

Taamatuttaaq energidrikkit, eqeersaatiniik soorlu koffeinimik akullit, ingasaallugu atuinikkut meeqqanut, inuusuttunut kiisalu inersimasunut peqqinnangissinnaaneri oqallinnermut ammasumut sivisuummik pissutaasimavoq. Imeruusaatiniik koffeinimik akulinnik eqqussanik

atuinerup annikillineranut, taamaasillunilu innuttaasut peqqissusaannut nalinginnaasumut pitsannguinermik akitsuutip kinguneqarnissaa naatsorsuutigineqarpoq.

Nunatta karsianut iluanaaruteqarnerunermik pilersitsisussamik aammali puiaasanik plastikkiusunik, utertittagaangitsunik, atuinerup annikillisinneranik, taamaasillunilu avatangiisitigut pitsannguutaasumik, imermut eqqussamut akitsuummik eqqussisoqassasoq saniatigut siunnersuutigineqarpoq.

Naggataatigut inatsisissatut siunnersuummut oqaaseqaatinullu tassunga tunngasunut innersuussissaanga.

Taamatut oqaaseqarlunga Naalakkersuisut sinnerlugit, siunnersuut Inatsisartunut suliassanngortippara.